

आकाशवाणी जयपुर-अजमेर

प्रादेशिक समाचार

दिनांक 25.08.2025

समय: 18.45 बजे

- भारत अर फिजी स्वास्थ्य, क्षमता निर्माण अर रक्षा समेत न्यारा-न्यारा हलकां ऊं जुड़्या सात करार कीना- प्रधानमंत्री नरेन्द्र मोदी इण ने दोन्यू देशां बीचे नुवो अध्याय बतायो।
- रक्षा मंत्री राजनाथ सिंह विद्यार्थियां मांय समाज अर देश रा भला सारु काम करण री सोच विकसित करण बाबत् कह्यो।
- प्रदेश रा ऊगणी हलकां मांय व्ह्या जोरदार मेह रे कारण उपजा हालात रो जिला कलेक्टरां ने सर्वे करण रा हुकम।
- चिकित्सा मंत्री गजेन्द्र सिंह खींवसर कह्यो- आरजीएचएस ने साफ अर व्यवस्थित बणावण री कोशिसां करी जा रही है।

000

भारत अर फिजी स्वास्थ्य अर मानकीकरण, क्षमता पैदाकरण अर केई मोटी परियोजनावां रा बारां मांय सात करार माथे सही कीनी है। प्रधानमंत्री नरेन्द्र मोदी आज नई दिल्ली मांय फिजी रा प्रधानमंत्री सिटिवेनी राबुका सागे शिष्टमंडल लेवल री बातचीत कीनी। ई पाछे खबरनवीसां सागे बातचीत करता थकां श्री मोदी कह्यो के दोन्यू देश हिफाजत समेत न्यारा-न्यारा हलकां मांय मदद बधावण माथे सहमत व्ह्या है।

000

ई पाछे प्रधानमंत्री दो दिन रा दौरा सारु अहमदाबाद पूग्या। वे करीब 5400 करोड़ रुपया रा खर्च वाळी विकास री न्यारी-न्यारी परिजनावां रा पूरा व्ह्या काम जनता ने संप्या। वे अहमदाबाद मांय जनसभा ने सम्बोधित कर रह्या है।

000

रक्षा मंत्री राजनाथ सिंह कह्यो है के बच्चां ने दिमागी तौर ऊं मजबूत बणावण अर वां रा अध्यात्मिक विकास माथे ध्यान देवणो जरूरी है। रक्षा मंत्री आज जोधपुर मांय आदर्श डिफेन्स अर स्पोर्ट्स एकेडमी रा पहला दौर रो काम जनता ने संपण रे मौके राख्यी ज्या कार्यक्रम मांय बोल रह्या हा। वे कह्यो के विद्यार्थियां मांय समाज अर देश रा भला सारु काम करण री सोच विकसित करणी चाहिजे। रक्षा मंत्री ई संस्थान ने रक्षा अर शिक्षा रो संगम बतायो।

000

ई मौके केन्द्रीय पर्यटन अर संस्कृति मंत्री गजेन्द्र सिंह शेखावत कह्यो के ओ केन्द्र बच्चां मांय अनुशासन अर देश री सेवा रा नुवा गेला बतावेला अर दूर-दराज रा गांवां रा बच्चां रा सपना ई रे मार्फत पूरा व्हे सकेला।

.000

लाल सागर परियोजना रा नाम ऊं विकसित करी जा रही ई एकेडमी रा काम माथे करीब 110 करोड़ रुपया खर्च व्हेला। ई रा पहला दौर मांय 30 करोड़ रुपया रा खर्च ऊं छात्रावास बणायी ज्यो है, जिण मांय 400 ऊं बत्ता विद्यार्थी रह सकेला।

ई छात्रावास मांय रहवण वाळा 200 विद्यार्थियां ने रक्षा अर 200 ई विद्यार्थियां ने खेल रा हलका सारू तैयार कर्या जावेला।

000

उपमुख्यमंत्री अर पर्यटन मंत्री दीया कुमारी प्रदेश री हर धरोहर ने बचावण अर वां री हिफाजत करण माथे जोर दीनो है। वे आज जयपुर कने आमेर रा किला री लारला दिनां टूटी भीत रो जायजो लीनो अर अहलकारां ने इण री मरम्मत रो काम बेगो करावण रा हुकम दीना। ई मौके वे कह्यो के धरोहर री ठौड़ां म्हाणी संस्कृति अर पिछाण रा जीता-जागता सबूत है। ई पाछे वे आमेर रा किला मांय अहलकारां सागे मीटिंग कर र आमेर रा पूरा विकास रो मास्टर प्लान बणावण रा बारा मांय ई चर्चा कीनी। प्लान मांय किला री भीतां ने नुवी बणावण, स्मारकां ने बचावण, लाइवकाफ्ट एरिया, फूड कोर्ट अर यातायात प्रबंधन ई भेळा कर्या जावेला। दीया कुमारी कह्यो के अ योजनावां सैलाणियां रा अनुभव ने और चोखो बणावेला।

000

प्रदेश रा विद्यार्थियां ने वोट देवण रा हक रा बारा मांय जाणकारी दी जावेला। ई सारू निर्वाचन विभाग अर शिक्षा विभाग बीचे करार करी ज्यो है। राज्य रा मुख्य निर्वाचन अधिकारी नवीन महाजन अर स्कूल शिक्षा विभाग रा शासन सचिव कृष्ण कुणाल ई माथे सही कीनी। करार रा तैत प्रदेश री सगळी सरकारी अर गैर-सरकारी सैकेण्डरी अर सीनियर सैकेण्डरी स्कूलां मांय निर्वाचन साक्षरता क्लब अर मतदाता जागरूकता ऊं जुड्या कार्यक्रम राख्या जावेला।

000

मुख्यमंत्री भजन लाल शर्मा आज विकसित राजस्थान-2047 री रूपरेखा, जनता रा भला री योनावां लागू करण अर बजट मांय करी ज्यो ऐलाण ऊं जुड्या कामां रा बारा मांय सांसदां अर विधायकां सागे बातचीत कीनी। मुख्यमंत्री रा रेहवास माथे राखी ज्यो ई कार्यक्रम मांय भाजपा रा सांसद अर विधायक ओहदा सारू चुणाव लड्या उम्मीदवार ई सिरकत कीनी। खबरनवीसां सागे बातचीत करता थकां गृहमंत्री जवाहर सिंह बेढ़म कह्यो के ई कार्यक्रम रे मार्फत जनता रा नुमाइन्दां ऊं जनता रा प्रति पूरी जवाबदेही सारू काम करण बाबत् कही ज्यो।

000

शिक्षा मंत्री मदन दिलावर खबरनवीसां ने बतायो के प्रदेश मांय व्ही जोरदार बिरखा पाछे उपजा हालात ने ध्यान राखता थकां जिला कलेक्टरां ने सर्वे करावण रा हुकम दिया ज्यो है।

000

प्रदेश रा कुछ हलकां मांय आवता तीन-चार दिन ताई भारी अर कठे-कठे घणी भारी बारिश व्हेवण रा आसार है। मौसम विभाग आज केई ज़िलां मांय बरसात रो ऑरेंज अर येलो अलर्ट जारी कीनो है। ई बीचे लारला चौबीस घंटां मांय केई ठौड़ां हल्की ऊं मझला दर्जा री बिरखा व्ही, जद के कठे-कठे भारी ऊं घरी भारी बिरखा व्ही। सिरौही ज़िला रा केर मांय 19 सेंटीमीटर पाणी बरस्यो। नागौर मांय 17, उदयपुर ज़िला रा खेरवाड़ा अर जालौर मांय 16-16 सेंटीमीटर मेह बरस्यो। सीकर, राजसमंद, डूंगरपुर अर हनुमानगढ़ मांय 10-10 सेंटीमीटर ऊं बत्ती बिरखा व्ही। सलूमबर अर सवाईमाधोपुर ज़िला रा नदी-नाळां मांय पाणी उफण रह्यो है। केई ठौड़ां सड़कां ने नुकसाण व्ह्यो है। सवाईमाधोपुर रा ज़िला कलेक्टर कानाराम बतायो के बारिश रो दौर मंदो पड़्यां पाछे अब हालात सुधरण लाग्या है।

000

करौली ज़िला रा सपोटरा हलका रो काठड़ा चार ऊं मेर पाणी ऊं घिर ग्यो है। अजमेर शहर रा रिहायशी हलका मांय भर्यो पाणी पम्प रे जरिये निकाळ्यो जा रह्यो है। ज़िला रा सगळा छोटा-मोटा तळाव भर ग्या है अर वरुण सागर माथे रपट चाल रही है। हनुमानगढ़ मांय दो दिन ऊं रूक-रूक र मेह बरस रह्यो है। नीचला हलकां मांय पाणी भर जावण ऊं आवण-जावण माथे असर पड़ रह्यो है। डूंगरपुर ज़िला रो मेवाड़ा बंधो ई छलक ग्यो है। ज़िला रा सोम-कमला-अम्बा बंधा रा सगळा 9 दरुजा खोल र बत्तो पाणी निकाळ्यो जा रह्यो है। पाली ज़िला रा जवाई बंधा मांय लगातार पाणी आ रह्यो है। चूरू मांय लारला चौबीस घंटां मांय व्ही झमाझम बिरखा पाछे न्यारी-न्यारी ठौड़ां पाणी भर ग्यो है। तेज बारिश री शंका ने ध्यान राखता थकां कोटा विश्वविद्यालय काल लिया जावण वाळा सगळा इम्तिहान टाळ दीना है।

000

चिकित्सा मंत्री गजेन्द्र सिंह खींवसर कह्यो है के राजस्थान सरकार रा कर्मचारियां सारू चलायी ज्यी स्वास्थ्य योजना-आरजीएचएस ने साफ-सुथरी अर व्यवस्थित करण री कोशिश करी जा रही है। वे आज जयपुर मांय खबरनवीसां ने आ जाणकारी दीनी। श्री खींवसर कह्यो के ई सारू गैर सरकारी अस्पतालां री मदद जरूरी है। वे कह्यो के योजना ने बेहतर बणावण सारू गैर-सरकारी अस्पतालां ने सुझाव देवणा चाहिजे।

000

चिकित्सा मंत्री बतायो के नई दिल्ली रा अखिल भारतीय आयुर्विज्ञान संस्थान- एम्स री भांत जयपुर मांय रिम्स खोल्यो जावेला। वे कह्यो के ई सारू विधानसभा मांय राजस्थान इंस्टीट्यूट ऑफ मेडिकल साइंसेज बिल-2025 पेश कर्यो जावेला। विश्व स्तर रा सुबीता वाळो राजस्थान इंस्टीट्यूट ऑफ मेडिकल साइंसेज स्वायत्त संस्थान रा तौर ऊं काम करेला।

000